

CART NI BCUAA SAN PABLĪ LO DE BNIETY GALACIA NI RELDILAAZ JESUCRIST

1 ¹ Nare Pablĭ naa apóstol (per gati binguichliuti bcuabee nare nicza gati laatideb bxiaalddeb nare sino que naa apóstol pur Jesucrist ne pur Xtadni Dios ni gusbány laany lo guelguty). ² Irate de sáan ni zuguaníaa caxiaaldni cartré lo iratecti ni reldilaazti Jesucrist nez Galacia. ³ Xtadni Dios ne Dad Jesucrist gunldeeny quiat ne iguaadny laat guelnaldiulaaz. ⁴ Jesucrist gutyny pur de xtuldni par íldany dunni lo irate de mal ni nuu lo guichliuré zec ni guc xgab Xtadni Dios. ⁵ Pur ningui, izaibgueldpac idxapni didxdoony iduibtiampte! Amén.

⁶ Quesentiand rdxaluaa dec xípalza gueeldza cabelaahti xtiidx Dios, ne laany pur guelrcaaz xte Crist guridxny laat. Per laat iriny diidx ni acayunti cuend ⁷ ne nicli gati xtiidx Diosiy. Ni nápacni nuu de ni cayun pur sacanti ax rcaazdeb ichudeb zec ni ná xtiidx Crist. ⁸ Per belati chúu ni iliiu laat irinquí diidx que zec de diidx ni abliuua laat par gacti perdón, laab ariáldbĭ castigu xte Dios, quit xi gúnti tutixiy masqui lagac nareniy o masquiza tuby ángli xte llayabaa. ⁹ Zec ni aguniia laat ne anre rbíi caniaa laat stuby: belati chúu ni iliiu laat irinquí diidx que zec de xtiidx Crist ni agüeldilaazti, laab ariáldbĭ castigu xte Dios.

¹⁰ Quit caguílytia nez gúna zec ni rcaaz binguichliu sino que cayuna pur gúna zec ni rcaaz Dios. Te pur belati gúna pur gúna zec ni rdxalaaz binguichliu ax agati xtiidxti Cristiy cacuadiaga.

¹¹ Rcaaza gacbeet de xcumpniera, dec de xtiidx Crist ni abliuua laat gati binguichliuti gudichlaazni. ¹² Ne nicliza quit cuátiani nicliza quit bseedtiani pur binguichliu sino que lagac Jesucrist bliuuni nare.

¹³ Laat guu chi bindiagti dec chi guua lo religiony xte de bniety Israel, quesentiand guzunalda de ni reldilaaz xtiidx Dios ax baania pur nisaandeb ni reldilaazdeb. ¹⁴ Ne nare mazrupac guzanalda religionqui que de bniety ni rac sáa te pur baania pur baania irate de costumbrĭ xte de to xpĭngul gulalni. ¹⁵ Per pur guelrcaaz xte Dios ax desdi anste ni idzinia guichliu, laany agac bcuabeeny nare. Chiy chi baanny xgab ¹⁶ ax bliulo Llinny luaa par itĭicha de didxzaac xtenny lo de bniety ni quit ná bniety Israel. Ne chi guc ziy quit tu güenabdiidxtia ¹⁷ nicliza quit guaatia Jerusalén par nianaa de ni agac ná apóstol anste gaca apóstol, sino que zágaca nez Arabia chiyru ax biequia guidx Damasco.

¹⁸ Deni guc chon iz chiyru guaa Jerusalén par bambiia Bed ax guzuguaníab tsangubidx. ¹⁹ Per quitru tu apóstolti gunáa quesoltisy Jacob bets Xtadni Jesucrist. ²⁰ Irate ni caniaa laat ná didxldí ne Dios nanchuuny dec quit caguílytia dixú.

²¹ Chiguld ax chiyru guaa nez Siria cun nez Cilicia. ²² Per de xpiny Crist ni rbez nez Judea zeczi gady gumbeetideb nare chiy. ²³ Bindiagtisdeb

rni de bniety: “Bniety ni guzunald dunni gulo anre acatiichbi xtiidx Jesucrist masqui guloqui baanbi pur nisaanni ni roldilaazniny.” ²⁴ Ax rdeeddeb gracy Dios pur ni areldilaazzaca Crist.

2 ¹ Chi guc tsidá iz, chiyru guaa Jerusalén stuby. Güenía Bernabé cun Tito ² te pur Dios gunii cháa ruy. Ne Jerusalénqui bdxasaan tuby lat cun púrzi de ni rnabee lo de xpiny Crist par beníadeb diidx pur de xtiidx Jesucrist ni caliuua de bniety ni quit ná bniety Israel. Nare baania ziy te pur quit rcaaztia dec ni abaania o ni cayunzaca gac dziiny xlieezy. ³ Per nicli Tito bniety griego ni zuguaníaa ruy, quit niuntideb juers níub seny zec de bniety Israel. ⁴ Te pur guu tuby tiop de bniety Israel ni runzi dec sáan racdeb par güelee bdxaaadeb lon par bldaatsdeb xi de aquitru rdxantin pur ni aroldilaazni Jesucrist te par ibíi inabeedeb dunni idxanni zec ni rnabee ley. ⁵ Per nicli tuby rat quit bsaantin niundeb gan dunni, te pur quit rcaaztin cuelaazti de didxldí xte Jesucrist ni azenuut.

⁶ Ne de ni rnabee lo de xpiny Crist quitzaru xi guniitideb nare ná par gúna masqui nicli quit xi riáldtia tú nádeb te pur nez lo Dios tubylote ná bniety. ⁷ Xlat ni niniideb naa xiru gúna, laadeb gucbeegacdeb dec Dios abcuabeeny nare par itiicha de didxzaac xte Jesucrist lo de bniety ni quit ná bniety Israel, zec ni bcuabeeny Bed par itiichbi de didxzaacqui lo de bniety Israel. ⁸ (Ne lagac Dios ni bcuabee Bed par gacbi apóstol lo de bniety Israel, lagac laany bcuabeeny nare par gaczaca apóstol lo de bniety ni quit ná bniety Israel.)

⁹ Pur ningui, Jacob, Bed ne Juany de ni mazru rnabee lo de ni reldilaaz Jesucrist, gucbeegacdeb dec Dios ná ni abniidx nare guelrnabeequi. Ax bniidxdeb naadeb zec tuby seny dec a rac sáan ne anádeb cunformi dec nare cun Bernabé choliuun de bniety ni quit ná bniety Israel. Chiy laadeb iliuudeb de bniety Israel. ¹⁰ Bsenelaaztisdeb dunni dec idxacnén de prob ne ziyqui ná ni rdxalaaza runa.

¹¹ Per chi güe Bed guidx Antioquía, chiy gudildníab pur quit cayuntib zec ni riáld ¹² te pur nidoote bquinnéb de ni quit ná bniety Israel. Per chi bdziny de bniety ni bxiaald Jacob guidx Antioquía, chiy aquitru nidxaatib lo de bniety ni quit ná bniety Israel pur ni bdxibbi xi ninii de ni zenuupac ley. ¹³ Irateru de bniety Israel ni reldilaaz Jesucrist ni rbez ruy nédeb baandeb zec ni baany Bed ax néru Bernabé baany ziy. ¹⁴ Pur ningui, chi gunáa dec quit cayuntideb zec ni rni xtiidx Crist ax raipia Bed nez lo iratedeb: “Laclaabiu nábiu bniety Israel ne quit nabánybiu zec laadeb ne, ¿xínii runbiu pur ibány de bniety ni quit ná bniety Israel zecac de bniety Israel?”

¹⁵ ‘Dunni desdi chi gulni nan bniety Israel ne quit guuti dxi nibánni sin ley xte Dios zec de ni quit ná bniety Israel. ¹⁶ Per dunni nánni dec ruteete quit tu chaleeti gacnia nez lo Dios pur guelrenuu leyqui sino que pur guelreldilaaz Jesucrist. Pur ningui néru dunni abioldilaazni Jesucrist

par gacni nania nez lony pur ni roldilaazniny, gati pur cadxantin zec ni rnabee ley. Te pur ruteete quit tu chaleeti gacnia nez lo Dios pur guelrenuu leyqui.

¹⁷ 'Anre belati dunni cadíilyni gacni nania nez lo Dios pur Crist, ne chiy anre belati néruza dunni nan binduld, ¿tatix mazru binduld cayun Crist dunni? Dunni nanchuun dec gati ziytiy ¹⁸ te pur belati absaana xley Moisés ne chiy ibíi yaicquia cun leyqui stuby ax lagacqui nare cayuna naa binduld. ¹⁹ Pur ningui nare absaana leyqui te par ibánia par Dios.

²⁰ Ax rúnaca xcuenda dec né nare gutia chi guty Crist lo cruzy ax agati narestia nabánia, sino que arbezniá Crist. Anre xquel ni nabánia, nare nabánia zec ni reldilaaza Lliin Dios ni rcaaz naa ne ni guty pur nare.

²¹ Ax quit rcuanaatia guelrcaaz xte Dios; te pur belati nialee niac bniety nania nez lony pur run bniety zec ni rnabee xley Moisés ax xíteete zeloti ni guty Crist.”

3 ¹ ¡Xípalza quit inianlaazti, de biny Galacia! ¿Tú bcuay xquelrienti? Negu chi bseedni laat, nez lot bdixteen xi par guty Jesucrist lo cruzy. ² Anre gulniispac nare: ¿Ta guleznét Spíritu Sant pur runti zec ni rnabee xley Moisés, o pur ni güeldilaazti xtiidx Jesucrist ni abindiagti? ³ ¿Ta lapacza nadtí ningui aldi rbeznét Spíritu Sant ne chiy an ax rliot dec par yalo gacti zec ni rcaaz Dios rquiinpac chanuut ley? ⁴ ¿Tatix quit xi bllíu de guelzii ni gudeedti, o ta gudeed xlieezyacti guelzii? ⁵ Chi rniidx Dios laat Spíritu Sant ne runny de milagri nez lot, ¿ta runny ziy pur runti zec ni rnabee xley Moisés o pur ni agüeldilaazti xtiidx Jesucrist ni abindiagti?

⁶ Gulchanelaz dec Abraham pur ni güeldilaazbi Dios ax gulucuendny laab zec tuby ni gady gúnti duld. ⁷ Pur ningui gulgacbee dec irate de ni reldilaaz Dios, laadeb nádeb zecac de lliin Abraham. ⁸ Desdi gulo agac nanchuu Dios dec masqui lo de bniety ni quit ná bniety Israel nuu de bniety ni cucuendny zecac tuby ni gady gúnti duld pur ni reldilaazdeb laany. Te pur tuby lat lo xquiitsny rnii dec laany raipny Abraham: “Nare zunldiia quia irate bniety guichliu pur liú.” ⁹ Pur ningui, runldee Dios quia de ni reldilaaz laany zecac ni banldeeny quia Abraham pur ni güeldilaazbi laany.

¹⁰ Irate de ni zenuu xley Moisés nuu castigu par laadeb te pur lagac lo libri xte leyqui rnii: “De ni quit chalaá gún irate zectispac ni rnabee ley, zialddeb castigu.” ¹¹ Pur ningui, ¿túlesa quit gacbee dec ruteete quit tu chaleeti gacnia nez lo Dios pur runbi zec ni rnabee ley? Te pur lo xquiits Dios rnii: “Bniety ni reldilaaz laany, napbi guelnabány nez lo Dios pur ni agulucuendny laab sin duld.” ¹² Per pur leyqui ax agati pur guelreldilaaztiy gap bniety guelnabány sino que lo libri xte ley rnii: “Elqui ni gún zectispac ni rnabee ley, zapquíb guelnabány.”

¹³ Jesucrist bdzicá dunni lo guelrgudé xte leyqui te pur laany biáldny castigu ni nidxaldni pur ley (te pur lo libri xte ley rnii: “Anudé bniety ni

raty lo cruzy”). ¹⁴ Ziy gudeed Jesucrist par chalee gunldee Dios quia de ni quit ná bniety Israel, zec ni banldeeny quia Abraham. Ne pur guelreldilaaz Jesucrist ax arbeznédeb Spíritu Sant zecqui ni gunii Dios desdi gulo.

¹⁵ Anre iniia laat xa run binguichliu. Chi racchuu tuby guiits entri tiop bniety ne rguudeb firmi lo guiitsqui, chiy aruteete quit tu chaleeti itsilni o icuaaruzadeb quia de diidx ni cá loqui. ¹⁶ Ziyzaquiy gulgabee dec chi biiian diidx gunldee Dios quia Abraham ne quia ni zá lo xfamilbi, lo xquiits Dios quit rniiti gunldeeny quia “de ni” zá lo xfamilbi. Quit rniitiny pur zieny bniety sino que pur tubyzi bniety, te pur laany rniiny quia “ni” zá lo xfamilbi. Ne ni zá lo xfamilbiqui ná Crist. ¹⁷ Ne ni caniia laat ná dec xley Moisés bdiacáni tap gayuaa treint iz después deni baany Dios promes cun Abraham, ax quit xo itsilti leyqui promes ni abaany Dios. ¹⁸ Te pur belati par icáan ni raipy Dios Abraham ná par idxanni zec ni rni ley, chiy ax agati promestiy. Per Dios bguaadny Abraham ni guniiny pur promes ni baanny gulo.

¹⁹ Nagaizdxa inabdiidxti nare: ¿Xiza par illiú ley dxa? Dios bniidxnay ley par gabee bniety dec casaclodebny, ax blliú leyqui axtqui dxi ni beed bniety ni zá lo xfamily Abraham zec ni baany Dios promes cun laab desdi gulo. De ángli xte Dios bdeed leyqui Moisés, chiy Moisés ax bteedni lo de bniety. ²⁰ Per chi baany Dios promes cun Abraham quit tu bteedti xtiidxnay sino que laapacny guninény Abraham.

²¹ Quit gúntit xgab dec caniia laat leyqui nuu contri de promes xte Dios. Sino que belrulati pur leyqui zelee gap bniety guelnabány lo Dios ax nanchuu bniety dec anania bniety nez lony pur guelrenuu ley. Per gati ziytiy ²² te pur lo xquiits Dios rni dec irate bniety nuu láani duld te par irate de ni reldilaaz Jesucrist scáadeb ni agunii Dios.

²³ Anste idiacá guelreldilaaz Jesucrist, gunabee ley dunní. Zecpacza chi riaagu bniety canuutisni idiacá guelreldilaaz Jesucrist. ²⁴ Pur ningui, par dunní leyqui ná zec tuby ni rguxnez bniety ax gunabee leyqui dunní axtqui dxi ni bdxambeen Jesucrist par gucuendni zec tuby ni gady gúnti duld pur guelreldilaaz laany. ²⁵ Per anre ni abioldilaazni Jesucrist aquit rquiinti cuxnez ley dunní.

²⁶ Te pur iratecni ni roldilaazni Jesucrist anan lliin Dios. ²⁷ Ne pur ni brubnisni pur Jesucrist ax anan tubyzi cun laany pur ni arbeznény. ²⁸ Ax aquit xi gúnti bel bniety Israel dunní o belza gati bniety Israel dunní, bel esclav dunní o belza gati esclav dunní, bel nguiu dunní o belza gunaa dunní, per par Crist tubylote nan pur ni anan tubyzi cun laany. ²⁹ Pur ningui, belati anan xpiny Crist ax anan zecac lliin Abraham ne sdxaldni ni raipy Dios Abraham gualqui.

4 ¹ Te pur zecqui tuby bniniin ni riáld herency lalzi náby bichiin, laaby xíteete guelrnabeeti napby zectiziac tuby mos, masqui xtenby a ná de xixten xtadby. ² Per nuu de ni rcualo ne rnabee laaby ne

de xixtenby axtqui chi idziny dxi ni gunii xtadby icáaby herencyqui.

³ Ziygaczaquiy dunni, zecac de bniiny gucni gulo pur ni bionuun irate de costumbri xte binguichliu. ⁴ Ne Dios chi bdziny dxi guc zec ni guniiny gac, laany bxiaaldny Llinny Jesucrist ni bdziny lo guichliuré pur tuby gunaa. Ax gubány zectisy ni rnabee ley ni bsanné Moisés dunni ⁵ par güelee bldány bniety lo leyqui ax güelee nan de llin Dios.

⁶ Ne pur ni anan llin Dios, laany bxiaaldny Spíritu Sant xte Llinny Jesucrist par ibeznény, ax pur Spíritqui rniin: “iXtadni Dios!” ⁷ Pur ningui aquitru nátin zec de mos sino que pur ni anan de llin Dios, ax sdxaldni herency xtenny pur Crist.

⁸ Guloru deni gady gumbeet merpac Dios, laat baanti sirvi lo de ni rlilot ná Dios ne nicli gati Diostidengui. ⁹ Per anre ni arumbeet Dios o ni arumbeeza Dios laat, ¿xíni rcaazti ibíi gúnti iralozy de ni baanti gulo? ¿Xíni rcaazti ibíi gacti zecpacza de esclav xte de cosqui stuby? ¹⁰ Anre ni agubíi zénet cuend xi de dxi o xi de búiu o xi de tiamp o xi de iz ná par gúnti tuby cos o stuby cosza zec ni guc xcostumbrit gulo. ¹¹ Cuantsi rdxibia pur laat te, ituguanla gadyqui bseed xlieezia laat!

¹² Pur ningui rguin rnaaba lot de xcumpniera: gulbány zec ni nabánia, zec ni baania pur bziiienti dec tubylote sáan rac. Quit caniitia laat dec nuu xi mal abaanti nare ¹³ te pur laat nánti dec gulogulote chi bseeda laat de didxzaac xte Jesucrist, nare racxúa chiy. ¹⁴ Per masqui ziy laat belaznét nare. Quit baantit despresy nare nicliza quit gulelaaztit naa, sino que baanti cuend nare zecpacza tuby ángli xte Dios o zecpacza lagacac Jesucrist. ¹⁵ Nare nána dec belati relee axt de bslot sbéet par niniidxti nare. Ne anre, ¿cún ni rcaazti naa? ¹⁶ O, ¿ta lalza rdxichnét nare pur ni guniia laat ni ná didxldí?

¹⁷ Rguixtiia lot dec de biny ni cayun pur gúnti cuend xtiidxdeb, gati dibylotisti rcaazdeb laat sino que xgabdeb ná: isaanti ni bseeda laat ax mazru gúnti cuend xtiidxdeb. ¹⁸ Xíteete náti icaaz bniety saani per par güen ne iduibteza tiamp, gati chi zuguanézia laat. ¹⁹ Par nare laat nát zecpacza de lliinia. Ax agubíi nuua nalas pur laat, zecpacza ni rdeed tuby gunaa nalas par idziny llinbi guichliu. Ne zelaa teda nalas axtisy chi azenuupacti Jesucrist zec ni riáld. ²⁰ iBelrulati zuguaníaa laat te par ininépaca laat, per ziy anre nicli quit ganna xa gúna cun laat!

²¹ Per gulnii nare, laat ni rcaazti ibányti zec ni rnabee ley: ¿Ta gady gacbeet xi rnii ley? ²² Ley rnii dec guu tiop llingaan Abraham. Guu tuby llingaanbi pur tuby gunaa ni bdialá Agar ni guc esclav xtenbi, ne guu tuby llingaanbi purquipac chialbi Sara. ²³ Llingaan Abraham ni cuáa esclav xtenbi, gulbi pur ni bguaald Abraham esclavqui. Per llingaanbi ni cuáa chialquipacbi, gulbi per agati purzítí ni bguaald Abraham chialni sino que par guc cumplir promes ni baany Dios cun laab. ²⁴ Anre Sara ne Agar, de bniety gunaaré ná ejempli par dunni pur tiop nez ni nuu par chanuu bniety. Tuby nezqui ná guelrenuu ley ni bdeed Dios Moisés quia

dany Sinaí, ax de ni zenuu leyqui laadeb nádeb zec esclav xte leyqui zec ni guc Agar esclav xte Abraham. ²⁵ Ne laat nánti dec nez Arabia ná dany Sinaí ax de bniety nezqui raipdeb danyqui, Agar. Per anre Jerusalén ná zec danyqui te pur irate de ni zá nez Jerusalén, de ni zenuu ley, laadeb nádeb zecac esclav xte ley. ²⁶ Per dunni quit nabánytin zec esclav xte de cosqui, ax llayabaa ná Jerusalén xtenni rut quit nátiza esclav, zec ni quit gucti Sara esclav. ²⁷ Ne lo xquiits Dios rnii:

Guzaclaaz liú gunaa ni quit xo icáatiu bdoo.

Gudzit guzaclaaz liú ni quit rumbiiu guelzii ni rdeed bniety par idziny lliinni guichliu.

Te pur mazrul zieny lliin ni quit xo icáatiu bdoo chúu, que lliin ni releegac rcáa bdoo.

²⁸ Nare rniia laat dec zectiziac ni gul Isaac pur ni güeldilaaz Abraham xtiidx Dios gac ziy, ziytiziacza dunni anan lliin Dios pur ni roldilaazni xtiidxny. ²⁹ Ne gulalqui llingaan Agar, baanbi burli llingaan chial Abraham. Ziytiziacza anre de ni zenuu ley rundeb burli dunni ni rbeznén Spíritu Sant, pur ni anan lliin Dios. ³⁰ Per laat nánti dec lo xquiits Dios rnii: “Bdialáa esclav xtenu cun tod llingaanbi, te pur quit náti par igaazy herency ni riáld llingaan chialu.” ³¹ Pur ningui de xcumpniera, dunni quit nátin zec llingaan esclavqui sino que dunni nan zec llingaan chial Abraham pur ni quit rnabeeti ley dunni.

5 ¹ Crist ná ni bldá dunni par quitru inabee ley dunni. Pur ningui, gulsutip, quit ibíi yaicquiti ibányti zec tuby esclav pur guelrun zec ni rnabee ley.

² Nare Pabli rniia laat: belati laat chúut seny zec ni rnabee ley, xíteete zeloti ni reldilaazti Jesucrist. ³ Ne nare rbíi rniia laat: tutix ni chúu senyqui tiixni anapbi que gúnbi irate zectispac ni rnabee ley. ⁴ Laat ni runtí xgab dec pur gúnti zec ni rnabee ley ax ananiat nez lo Dios, niy zelo dec aquitru nátit xpiny Crist nicliza quitru zénetit cuend guelrcaaz xte Dios. ⁵ Per dunni pur Spíritu Sant ne pur roldilaazni Jesucrist zonén cuend dec sdzinni nania nez lo Dios. ⁶ Te pur chi a ná bniety tubyzi cun Crist xíteete zeloti bel nuu bniety seny o belza quity bniety seny. Ni mazru sac ná guelreldilaaz laany. Ne pur guelreldilaazqui nuu guelrcaaz ax relee nabánni zacru.

⁷ Laat güenqui aldi zét. Ne, ¿tú gunii laat quitru gúnti cuend ni ná didxldí? ⁸ Te pur xgabqui quit zéedtini pur Dios ni bcuabee laat par laany. ⁹ Pur ningui, gulcualo laat te cun tuby bichiin zelee gac iratet engany. ¹⁰ Per nare napa confianz Crist dec laat quit isaantit ni abseeda laat. Ne Dios gúnny castigu ni casacan laat masqui tutixpac laab.

¹¹ Belati nare zeczi zélaa rniia dec rquiinpac chúu bniety seny, ¿tatixza zunald de bniety Israel naa? Ne ziyza bel iniaa chúu bniety senyqui niy zelo dec quit xi zeloti ni guty Jesucrist lo cruzy. ¹² ¡Ójla irate de ni run storbi laat dec ná par chúut seny, güenru su itiuudeb lagac laadeb!

¹³ Te laat agulát lo ley, per gati pur aquitru rnabee ley laat ax agúnti zectisy ni rcaazti, sino que gulcaaz ne gulgacné de saat. ¹⁴ Te pur cun tuby mandamient abaany bniety irate zec ni rnabee ley xte Dios. Mandamientqui rnii: “Bcaaz de soo zecac liú.” ¹⁵ Per belati laat rdxichnesaat ne rdildti, gulcualo te quit ziyzi ax aldasaat.

¹⁶ Pur ningui, rniia laat: Gulbány zec ni rnabee Spíritu Sant ibányti. Quitru ibányti zectisy ni ná xgabti. ¹⁷ Te pur guelrbány zec ni ná xgabni quit nátini zec ni rnabee Spíritu Sant ibány bniety. Ne zec ni rnabee Spíritu Sant ibány bniety quit nátini zec ni rnablaaz bniety ibány. Ni tuby ni stuby quit náti tubylo, ax nagánquipac par ibányti zec ni riáld.

¹⁸ Per belati Spíritu Sant ná ni rnabee laat ax aquit rnabeeti ley laat.

¹⁹ Anre güeldíteza ná cún de ni zéed pur xgabzi bniety: guelráp stuby nguiu o stuby gunaa, guelrun de ni quit illiú, guelráp iralozy vicy,

²⁰ guelrto iralozy ni rlilo bniety ná Dios, guelrseed dichab par gún bniety mal saani, guelrdxichnesaa, guelrdildy, guelrzebylaaz xixte bniety, guelnadxiichtispac, guelrzubyaa lagac laani, guelrldasaa bniety, guelruu de xpinni, ²¹ guelracnalaaz, guelrguinxú bniety, guelrzuz, guelnalá ne irazru de mal ni ná zecac de cosqui. Rguixtiia lot zectiziac ni aguniia laat gulo, dec de ni cayun saa de cosré quit xo yáldtideb rut canabee Dios.

²² Per ni zéed pur Spíritu Sant ná: guelrcaaz bniety saani, guelrzaclaaz, guelnaldiulaaz, guelráp paciency, guelnazaclaaz, guelgac güen cun tutix, guelgún cumplir xtiidxni, ²³ guelnadolaaz, ne guelrzu lo de mal xgab xtenni. Pur de cosqui quitti ley ni icua gún bniety de cosqui. ²⁴ Ax de ni a ná xpiny Crist absaandeb irate duld ne irateru de mal ni zéed gan gúndeb, pur ni aguty Crist pur irate duld. ²⁵ Anre belati arbeznén Spíritu Sant ná par ibánni zec ni rnabeeny ibánni.

²⁶ Quit náti par idxannaroon, nicli quit náti par izubyaan lagac dunní ne nicliza quit náti par gacnalaazni cun sáan.

6 ¹ Rguixtiia lot: belati tuby de saat gún duld gan laab, laat ni anánrut xtiidx Dios ná par ilidxtib cun púrzi didxguuz, te pur ná par chanét cuend dec ziyza laat zelee gún duld gan laat. ² Gulgacnesaa cun de guelziitisy ni rdeedti, te ziy xquel ax acayunti zec ni rnabee Crist gúnti.

³ Belati nuu ni rlilo dec anánbi irate ne nicli quit xi gánbi, ax lagacqui laab casacanbi laab. ⁴ Tuby, tuby bniety ná par gún xgab la nabányquib zec ni rcaaz Dios. Ne bel güenqui nabánybi, laaisquibiy ná par saclaazbi xlat ni gúnbi xgab dec güenru nabánybi que iraru bniety. ⁵ Te pur tuby, tubyni lagacqui dunní ná par icualon xa xquel nabánni.

⁶ Tutix de ni caseed xtiidx Dios ná par gacnédeb bniety ni rliuu laadeb te par chalee gacbi guelnabány.

⁷ Quit isacanti lagac laat, te ruteete quit tu chaleeti gún burli Dios. Ni rzibiny bniety niyza rcáab. ⁸ Bel nabánybi zectisy ni ná xgabbi zuu chi

chadxani ax ziáldbì ni riáldbì. Per ni nabány zec ni rnabee Spíritu Sant, pur Spíritu Sant ziáldbì guelnabány par chazy nez lo Dios. ⁹ Quit náti par choxaclaazni idxanni ni ná güen. Te pur belati quit choxaclaazni, chi idziny dxi sdxaldni ni riáldni. ¹⁰ Pur ningui, cad chi relee ná par idxacnéni bniety, mastecru cun de saniroldilaazni Jesucrist.

¹¹ Gulguiaa xi guroo de letri cacuáa par laat cun naapaca. ¹² De ni cayun pur cayun dec chúpacti seny, rundeb ziy par yanzaacdeb nez lo bniety xlat ni teeddeb guelzii pur guelreldilaaz Jesucrist. ¹³ Per nicli de ni ruu senyqui quit runti irate zec ni rnii ley. Rcaazzideb chúut senyqui te par izubyaadeb laadeb dec abaandeb gan laat nuu senyqui tiixti.

¹⁴ Per nare quitru xi purti izubya naa, quesoltisy pur guelguty xte Xtadni Jesucrist. Ne pur ni gutyny lo cruzy absaana irate de mal ni nuu lo guichliuré ne aquitia par de malqui. ¹⁵ Te pur chi a ná bniety tubyzi cun Crist xíteete zeloti bel nuu bniety seny o belza quit nuu bniety seny. Ni mazru sac ná dec abchu zec ni nabánydeb. ¹⁶ Ne de ni azenuu xnez Crist, Dios ilaslaazny laadeb ne iguaadny laadeb guelnaldiulaaz cun irateru de ni guldípac ná xpiny Dios.

¹⁷ Desdi anre quitru tu rcaaztia inii nare tú bniidx nare guelrnabee. Te pur de diib ni nuu tiixa rguixtee dec naa apóstol xte Jesucrist.

¹⁸ Ne Xtadni Jesucrist laany gunldeeny quia iratecti. Amén.